

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗門布，摺正對甜甜夢肚醒來个僵攢手；難得个放寮日，懶在眠床看日頭輕輕徒步、聽窗門外鳥聲吱啁，時間也像恬恬頓腳咧，啊！這靚靚个朝晨。

食飽朝，想去尋久無見面个朋友遶寮。自家駛車，時間扼在自家个手頭町，做得慢慢仔行、定定仔寮；經過鬧熱个街路，車輪仔轉落鄉道，來到苗栗个穀倉——灣裡。路兩片金黃飽米个禾串強強會對田肚淳出來；風吹來，一陣一陣歡喜到手攘腳踏、搖頭扭腰个金黃稻浪，分人心情暢快。田脣企等兩個在該比手畫腳个阿伯，日頭晟來，笠嫻下晒到烏刻刻个面町，單淨看著兩排雪白个牙齒，想來應該當滿意今年係好年冬咧！

幹過一隻大彎幹，共樣係闊野野个田地，直直透到山下；深深淺淺个黃襯等青青个田、綠綠个大樹，像係天公伯个調色盤，乜係這隻豐收季節正有个景色。該向有幾夫既經割忒早冬禾，準備愛過蒔二冬禾个田，田水鮮鮮，將朗朗个藍天摺白雲、田脣个樹仔摺人家个屋，清清楚楚反映出來，斯像框在用田塍做相框裡

肚个相片，實在還靚。這向堵好有一夫田當在該割禾，紅色个割禾機在田肚緊行緊割，三、四個人在脣頭搨手，無閒直掣；割禾機背後跔歸陣白鶴，有兜低頭絡食、有兜大步行尋食、有兜飛高飛低搶食，鬧熱煎煎，這斯係田肚最有生命力个畫面咧！

車仔慢慢仔溜落莊頭，伏在路脣个老狗牯看著車仔來，伸懶筋企起來拂尾，像迎接老朋友樣。一個著花衫个伯姆跔在屋面前个菜園摘菜，菜園分屋蔭等、日頭旨有晒著，青里里个菜葉面還有露水，看起來當萋、當錫人食。兩個國小年紀个細阿哥仔，一儕慢慢仔箭自行車、一儕半行半走、手町還拗等籃球，嘻嘻哈哈有講有笑愛共下去打球仔。這一路个光景，實在分人心情鬆爽。

主人準備好一桌點心、地豆摺瓜子，還有清香个高山烏龍茶，三、四個當久無見面个老朋友，天南地北講到毋知天合地。茶香、情醺，靚靚个日仔、靚靚个心情，這斯係簡單个幸福。

編號 2 號

【陂塘】許倩雯原作

用鏡頭記錄臺灣這遍土地个導演齊柏林，坐在直升機頂對天頂看往下，形容桃園个陂塘就像係「散落一地泥个水晶，金若若仔<sup>1</sup>！」

兩隻白鶴一前一後在陂塘面頂飛過，白雪雪个身影倒映在平靜个水面。水蓮花<sup>2</sup>對青青个水肚探出頭，細細蕊个黃花就像天頂緊瞞緊瞞个星仔，靚到耐毋得。

立秋正過啊忒，陂塘就飛來一群準備愛過冬个人客！鬥腳鳥<sup>3</sup>水紅色个長腳，踩在淺水个位所定仔行，鳥觜在水竇肚掃來掃去，無閒在該尋食。花刺花刺个細水鴨撈頭那汨落水肚，屎朥翹到半天高。忽然間，一粒扁扁个石頭飛啊過來，嚇到這群鳥仔披翼飛起。原來係陂塘脣，走來一群細啞仔在該打水漂仔。坐在樹下擎等釣槓个男仔人，大聲罵：「有人在這釣魚仔，你兜孤盲頭在該變麼个齣事，毋好來這搞！」

月光蹶上天頂，在水撈地个合界，白鶴花<sup>4</sup>个清香跔等夜風散開來。夜呱仔<sup>5</sup>醒咧，昏哆昏哆仔<sup>6</sup>喊幾聲「嘎！嘎！嘎！」像烏鈕仔恁大个蜗蠕仔扭等尾泗水，膻身既經生出四支腳咧，在陂塘角尋位所上岸。蛇哥發現在水肚跳出來个烏影，黏時對草竇趁啊出來，開始追佢兜！

有人撈桃園喊做「千陂之鄉」，這肚底像碗公樣，大大細細个陂塘，全部係人工挖出來个。先民在開墾个過程肚盡艱苦，高不將挖陂塘來頓水蔭田。陂塘最多个時節，有萬過隻，也變成桃園當特殊个地理景色。每一隻陂塘都有自家个故事，當多人第一擺泗水、第一擺釣魚仔，都係在陂塘肚發生。

年堵年，跔等時代个流轉，桃園都市化个程度緊來緊高。有兜陂塘失忒蔭水个功能，一隻一隻分人屯忒，起做機場、學校，抑係公園咧。伸下來个陂塘，經過整頓，嘎有了新生命个延續，變成現代人休閒遶寮个好所在！

<sup>1</sup> 金若若仔：音 gim` na` na` er；金光閃閃。

<sup>2</sup> 水蓮花：音 shui` lien fa`；臺灣萍蓬草。

<sup>3</sup> 鬥腳鳥：音 deu` giog diau`；高蹺鴿。

<sup>4</sup> 白鶴花：音 pag` hog` fa`；野薑花。

<sup>5</sup> 夜呱仔：音 rha` gua` er；夜鷺。

<sup>6</sup> 昏哆昏哆仔：音 fun de fun de er；頭暈腦脹的。